

mun. (4. Electio differt a Postulatione, quia electio innititur Juri, et postulatio innititur gratiæ. Sic Glossa communiter recepta in cap. unico, *De Postulat. Prælator.* in 6, verb. *Eligo postulando.* Electio enim est personæ habilis, et idoneæ ad dignitatem, et si Canonice sit celebrata, atque ab Electione acceptata, confert huic Jus ad Prælaturam, ita ut absque injuria rejici non possit, et si suæ electionis confirmatio sibi denegetur, potest eam Electus actione instituta petere, eo quod de Jure debeatur, ut cap. *Postquam 3, de Election.* et docet amplius Glossa ad Rubricam tituli *de postulat. Prælator.* in 6. (5. Postulatio vero est personæ aliquo defectu, vel impedimento laborantis, ob quod non est eligibilis, ac propterea dispensatione opus habet, ut si quis non sit procreatus de legitimo Matrimonio; cap. *Innotuit 20, de Election.* vel quia non habet legitimam ætatem, aut similem defectum patiat, quem Superior non tenetur dispensative admittere ex justitia, sed solum ad dispensandum cum eo, atque ad ejus admissionem concedendam, quandoque movetur ex gratia, cap. *Bonæ memoriæ 3, de Postulation. Prælator.* et Glossa ibi verb. *Gratia.* Unde Postulatio describitur, quod sit alicujus personæ ad Prælaturam, seu dignitatem, Ecclesiasticam erga Superiorem directa petitio, ut eam dispensative admittere dignetur. Est in re communis.

(6. Electio differt a Præsentatione, quia Præsentatio ab uno solo fieri potest, et etiam per litteras, et Electio non nisi a pluribus, et capitulariter congregatis fieri potest; cap. *Nullius 1, et cap. Quia propter 52, de Election.* Insuper Jus eligendi ad Beneficium Ecclesiasticum non competit Laicis; cap. *Sacrosancta 51, et cap. Massana 56, de Elect.* bene tamen jus præsentandi, cap. *Quod autem 5, et cap. Pastoralis 29, de Jurepatronat.* Deinde Electioni correspondet confirmatio. Præsentationi autem institutio per Superiorem facienda, nam Electionem ad Ecclesiam, vel prælaturam de aliquo idoneo canonice, factam tenetur Superior de jure confirmare et Clericum idoneum legitime a Patrono præsentatum tenetur instituere. (7. Unde Præsentatio describitur, quod sit Personæ idoneæ ad Episcopum, vel alium, cui competit institutio, per Patronum legitime facta exhibitio, ut ei de Beneficio vacante provideat. Est in re communis.

(8. Electio differt a nominatione, quia Nominatio fit de pluribus, et Electio de uno solum, ut colligitur ex cap. *Quod sicut 28, de Elect.* ibi: « Cum ex prima Electione, quæ facta de tribus dicenda videtur potius Nominatio, nihil juris acquisitum sit Nominatis: » deinde per Electionem, postquam est acceptata, acquiritur jus Electo, non sic autem acquiritur jus Nominato per Nominatorem. cit. cap. *Quod sicut 28, de Election.* ibi: « Nihil juris acquisitum sit Nominatis: » Insuper Nominatio potest fieri, et fit alternative, Electio autem determinative: Electio quippe fit de uno solum determinate, Nominatio autem solemniter fit de pluribus alter-

native, ut ex illis Superior, vel hunc, vel illum promoveat; Fagh. in cap. *Bonæ memoriæ 3, de Postulat. Prælator.* num. 68. (9. Unde Nominatio solemniter describitur, quot sit illa, per quam duo, vel plures excellentiores nominantur, seu proponuntur Superiori ad hoc, ut unum ex illis admittat, eique de Beneficio providere dignetur; est in re communis. Dicitur autem notanter « Nominatio solemniter, » quia ut advertunt Abbas in cap. *Quod sicut 28, de Election.* num. 1. Fagnan. in cap. *Bonæ memoriæ 3, de Postulat.* num. 79. Barbosa lib. 1. *Jur. Eccles. univers.* cap. 49, num. 17, et alii passim. (10. Nominatio est triplex, prima est Nominatio consultoria, quæ præcedit Scrutinium, et fit in Collegio aliquos proponendo, ut si digni judicati fuerint, per scrutinium eligantur; et per hanc nullum jus acquiritur Nominatis; cit. cap. *Quod sicut 28, de Election.* cum per talem Nominatorem exprimat solum consensus de futuro, et tali nominatione non obstante, possint Capitulares eligere alium, ut observant citati Doctores, et docet in dies experientia. Secunda est Nominatio, quæ fit in Scrutinio, quando Electores secreto aliquem in Chartula nominant, juxta cap. *Si quis juste 46, de Election.* in 6, et hæc coincidit cum votatione privata singulorum Eligentium, atque exprimit consensus de præsentati, et licet, antequam publicetur talis Nominatio, possit variari, publicato tamen scrutinio, non potest amplius per Electores variari, textu expresso in cap. *Publicato 28, de Election.* ibi: « Publicato scrutinio, variare nequeunt Electores. » Tertia est Nominatio illa solemniter, per quam duo, vel tres digniores nominantur Superiori, ut ex illis unum promovere dignetur.

(11. Electio differt a Petitione, quia Electio tribuit Electo ipsam acceptanti jus ad confirmationem, quæ si sibi injuste denegetur, potest eam, actione instituta petere, eo quod ex justitia ei debeatur, ut colligitur ex cap. *Postquam 3, de Election.* ac notat Abbas ibid. num. 1, dicens quod confirmatio sit necessitatis, licet Electio a principio fuerit voluntatis. Simplex vero Petitio nullum tribuit jus Petito cum non obstante, quod Plebs, seu populus aliquem petat sibi dari in Prælaturam, possit Superior ipsum non concedere. (12. Unde simplex Petitio describitur, quod sit supplicatio, qua Plebs ipsa, seu populus aliquem sibi dari in Prælaturam deprecatur. Est in re communis, et colligitur ex cap. *Nulla ratio 1, dist. 62, ibi: « Nec a Plebibus sunt expediti, » etc. Quod Dei timorem 5, de Statu monachor.* ibi: « Quod jam dicti Parochiani a nobis ratum haberi suppliciter postularunt. »

(13. Electio differt a Collatione, quia per Electionem acceptam acquiritur solum jus ad rem respectu Beneficii, seu Prælaturæ, cum electus ante confirmationem non possit dicere Beneficium esse jam suum, sed solum sibi debitum. Layman lib. 1. *Decretal.* tit. 6, num. 4. Pirhing. ibid. num. 2. Reiffenstuel. ibid. num. 31. Passerin. cap. 33, *de Election.* n. 7, testans hanc de communi;

argum. cap. *Super his 16, de Accusationibus.* Per Collationem vero Beneficii, quam quis ratam habuit, acquiritur jus in re, et quasi dominium in ipso, licet possessio ipsius nondum acquisita fuerit, ut notat Layman. l. c. n. 4. Garcias cum multis aliis part. 4, *de Beneficiis* cap. 2, num. 1. Reiffenstuel, loc. cit. n. 23, arg. cap. *Si tibi absenti 17, de Præbend.* in 6. (14. Unde Collatio libera describitur, quod sit gratuita Beneficii Ecclesiastici vacantis concessio facta ab Episcopo, vel alio habente facultatem. Est in re communis. Dicitur autem notanter « Collatio libera » ad exclusionem Collationis necessariæ. Collatio enim dividitur in liberam, et necessariam. (15. Collatio libera est mox descripta, et dicitur libera, quia licet habens jus conferendi libere Beneficia teneatur hæc intra tempus a Jure præfixum conferre personis idoneis, libere tamen confert cui voluerit ex idoneis. (16. Et hæc collatio libera, seclusa speciali concessione, non potest fieri per Vicarium Generalem Episcopi, cap. final. *de Officio Vicarii* in 6. (17. Neque ipsa transit ad Capitulum, Sede vacante; cap. unic. *de Institut.* in 6. (18. Collatio autem necessaria est ea, quæ fit ex necessitate Juris, videlicet ad præsentationem, nominationem, electionem alicujus, vel ad mandatum Superioris, aut ex causa permutationis Beneficiorum. Glossa in Clement. unic. *de rerum Permutat.* verb. *Conferantur;* Barbosa tract. *de Appellativa* verbor. Juris significat. appellat. 54. et alii passim. Et dicitur necessaria, quia Superior de necesse debet conferre Beneficium ipsimet præsentato, nominato, electo, permutanti, aut providenti mandato, si sit idoneus. (19. Et hæc Collatio potest fieri etiam per Capitulum, Sede vacante, c. *Olim 14, de Major. et Obedient.* et c. unic. *de Inst.* in 6.

(20. Forma Electionis est triplex, scilicet Forma Scrutinii, Forma Compromissi, et Forma Inspirationis, textu expresso in c. *Quia propter 42, de Elect.* ibi: « Quia propter diversas Electionum formas, quas quidem invenire conantur, et multa impedimenta proveniunt, et magna pericula imminant Ecclesiis viduatis, statumus, ut, cum Electio fuerit celebranda præsentibus omnibus, qui debent, et volunt, et possunt commode interesse, assumantur tres de Collegio, et fide digni, qui secrete, et sigillatim vota cunctorum diligenter exquirant, et in scriptis redacta mox publicent in communi, nullo prorsus appellationis obstaculo interjecto, ut iscollatione habita eligatur, in quem omnes, vel major, vel sanior pars Capituli consentit; vel saltem eligendi potestas aliquibus viris idoneis committatur, qui vice omnium Ecclesiæ viduatæ provideant de Pastore, aliter electio facta non valeat; nisi forte communiter esset ab omnibus, quasi per inspirationem, absque vitio celebrata. Qui vero contra præscriptas formas eligere attentaverit, eligendi ea vice potestate privetur. Illud autem penitus interdiximus, ne quis in Electionis negotio Procuratorem constituat, nisi sit absens in eo loco, de quo de-

bet advocari, justoque impedimento detentus venire non possit, super quo, si opus fuerit, fidem faciat juramento, et tunc, si voluerit, uni committat de ipso Collegio vicem suam. Electiones quoque clandestinas reprobamus, statuentes, ut quam cito electio fuerit celebrata, solemniter publicetur. » Ubi vides, quod generaliter reprobantur omnes aliæ diversæ a tribus dictis Electionum formæ, decernendo, quod « aliter facta Electio non valeat. » (21. Hinc Electio per sortes est nulla, utpote facta contra dispositionem irritantem hujus Capituli. *Quia propter,* et talis Electio per sortes in specie reprobatur, et fieri prohibetur etiam in cap. *Ecclesia vestra 3, de Sortilegiis.*

(22. Electio per scrutinium est illa, quæ præsentibus omnibus qui debent, volunt, et possunt interesse, fit per Collectionem suffragiorum circa eum in quem major, et sanior pars Capituli consentit. Est in re communis, et habetur clare ex citat. cap. *Quia propter, 42 de Election.* (23. Ex quo Capite, seu Canone secundum Joann. Andr. ibid. n. 28, quem Doctores communiter sequuntur, teste Fagnano ib. n. 36, colliguntur octodecim substantialia formæ Electionis per Scrutinium. Primum igitur Substantiale est, ut fiat per congregatos in unum. Secundum, ut Scrutatores assumantur a Collegio. Tertium, ut Scrutatores sint tres. Quartum, ut Scrutatores sint de Collegio. Quintum, ut vota singulorum exquirantur secreto. Sextum, ut exquirantur singillatim. Septimum, ut exquirantur vota cunctorum. Octavum, ut vota in scriptis redigantur. Nonum, ut vota in communi publicentur. Decimum, ut publicentur mox. Undecimum, ut fiat collatio numeri ad numerum, meriti ad meritum, et zeli ad zelum. Duodecimum, ut collatio fiat incontinenti post publicationem. Tertiumdecimum, ut fiat communis Electio. Quartumdecimum, ut eadem Electio fiat statim post collationem. Quintumdecimum, ut electio fiat de illo, in quem major, et sanior pars Capituli consentit. Sextumdecimum, ut Electio fiat verbalis. Decimumseptimum, ut Electio non sit clandestina. Decimumoctavum, ut prædictorum omnium Ordo servetur. Hæc apud Fagnan. in d. cap. *Quia propter,* ubi late a n. 37, usque ad n. 66, inclusive. Vide etiam Reiffenstuel. lib. 1, *Decret.* tit. 6, n. 146, ubi docet quod non valet Electio celebrata a saniori parte Capituli, nisi ea etiam sit major; cap. *Cumana 50, de Elect.* et ibi Communis Doctorum.

(24. Electio per Compromissum illa est, quæ fit, quando Capitulares præsentibus facultatem eligendi in unum vel plures idoneos viros conferunt, qui vice omnium eligant. Est in re communis; et habetur clare ex d. c. *Quia propter,* et concordat c. *In causis 30, de Elect.* (25. Ad faciendum Compromissum pro Electione requiritur consensus omnium Vocalium, ita ut unius dissensus Compromissum impediat, et Electio aliter facta non valeat; cit. cap. *Quia propter,* ibi: « Qui vicem omnium... Aliter Electio facta non valeat. » Ita Glossa ibid. verb. *Vice*

omnium, et Doctores communiter, teste Abate ib. § *Vel saltem* n. 2 et 6. (26. Compromissum pro Electione potest fieri etiam in unum solum, quamvis ipse non sit de Collegio, arg. cap. *Causam 8, de Election.* ubi Moniales compromiserunt pro Electione Abbatis in Episcopum, qui erat solus, et non de Collegio. Glossa ib. verb. *Contulerint*, et Glossa communiter recepta in cit. c. *Quia propter*, verb. *Viris*. (27. Compromissum non potest fieri in Laicum; cap. *Contingit 8, de Arbitris*, cap. *Decernimus 2 de Judiciis*. (28. Unus compromissarius nequit eligere seipsum; arg. cap. *Cum ad nostram 7, de Instit.* ubi statuitur, quod nemo potest instituere semetipsum in Beneficium, addita ratione, « Cum inter dantem, et accipientem debeat distinctio personalis, » cap. *Per nostras 26, de Jure patronat.* ubi statuitur, quod nemo potest presentare seipsum ad Ecclesiam, etiam de suo Jure patronatus, ibi: « Nullus se potest ad Personatum alicujus Ecclesie presentare, quantumcumque idoneus sit. » Sic Glossa communiter recepta in cap. *Cum in Jure 33, de Election.* verb. *Ex se, vel aliis*. « Quia, dicit ipsa, Nemo debet oriri a se ipso, » cap. *In scripturis 9, caus. 8, q. 1, cum similibus*: (29. Si Compromissarii sint plures, possunt ii aliquem ex se ipsis eligere, quamvis in Compromisso id non sit expressum, dummodo non fuerit expresse prohibitum; sic Abbas cit. cap. *Cum in jure*, n. 4, ubi pro hac sententia allegat Innocent. Hostiens. et quasi communem aliorum, et hanc tenent novissime Pirhing. lib. 1. *Decretal.* tit. 6, n. 22. Reiffenstuel. ib. num. 99. Engel. num. 21. Sanigh. cap. 4, n. 24. Passer. cap. 22, de *Elect.* n. 4, et alii. (30. Compromittentes tenentur recipere electum a Compromissariis, c. *Causam 8, de Elect.* et communis Doctorum. (31. Dummodo tamen servata fuerit forma Compromissi, quia, si Compromissarii terminos potestatis sibi tradita non servaverint, non valet electio inde secuta, cap. *Cum dilectus 23, et cap. Cum in veteri 52, de Elect.* (32. Electio per Inspirationem est illa, quae fit per veram Dei revelationem, qualis inter alias fuit electio S. Nicolai, S. Ambrosii, et S. Severi, de quibus fit mentio in cap. *Statuimus 8, dist. 61*, ibi: « Beatus Nicolaus ex Laico electus est in Episcopum. Beatus Severus ex Lanificio assumptus est in Archiepiscopum. Beatus Ambrosius, cum nondum esset baptizatus, in Archiepiscopum est electus. » (33. Electio autem per quasi Inspirationem est illa, qua Electores omnes quasi per Inspirationem Spiritus Sancti concorditer moti, nullo praecedente tractatu, communiter uno corde, et ore in eundem consentiunt. Est in re communis, et habetur clare in c. cap. *Quia propter 42, de Election.* ibi: « Aliter Electio facta non valet, nisi forte communiter esset ab omnibus quasi per Inspirationem absque vitio celebrata. (34. Ubi advertit, quod notanter ibi dicitur « absque vitio celebrata, » quia requiritur, ut talis Electio sine ullo vitio Simoniae, requisitionis, subornationis, et consensus extra Capitulum ante Electionem dati, atque ab omnibus, et singulis libere, et

concorditer uno corde, et ore consentientibus fiat, aliter non esset Electio quasi per Inspirationem celebrata, arg. cap. *Per inquisitionem 26, et cap. Post petitam 46, de Elect.* (35. Hinc electus ac clamore populi non debet per Superiorem confirmari, ut statuitur in cap. *Osius 2, de Election.* ibi: « Cum sit manifestum potuisse plures eorum, qui sinceram fidem non habent, praemio, et mercede corrumpi, ut clamarent in Ecclesia, et ipsum petere viderentur, omnino fraudes has damandas esse arbitror. » Unde, ubi subest suspicio fraudis, non est censenda Electio facta per quasi Inspirationem.

## ADDITIONES EX ALIENA MANU

(36. Formam electionis a notissimo cap. *Quia propter, de Elect.* praescriptam, de qua agit Auctor a n. 20, locum non habere nisi quod Beneficia, ex quorum vacatione propriis Pastoribus viduata remanet Ecclesiae, post alios firmavit Rousseud de la Combe in sua *Jurisprud. Canonica* verb. *Electio*, n. 10, et respondit Rota coram Caprar. decis. 538, n. 1, et dec. 593, pariter n. 1. (37. Quod vero concernit caetera Beneficia, nisi forma electionis determinata sit statuto, vel consuetudine Ecclesiae, de qua agitur, *sufficit*, ut inquit Rota cor. Caprar. dict. dec. 538, n. 2, « Consensus naturalis, sive verbis, sive factis explicatus, » et adamussim convenit cum mox dicta decis. 593, n. 2.

(38. In electione autem facienda servata forma dict. cap. *Quia propter*, is, qui a medietate capitularium electus est, nequit accedere electioni sui ipsius ad constituendam pluralitatem ipsorum capitularium; (39. potest vero accedere in impropria illa electione, in qua non est servanda forma, dict. c. *Quia propter*; Cardin. de Luc. de *Canonic.* discours. 26, n. 6, et seq. Optime Louvrex *Dissert. canonic.* 7, n. 44, et plur. sequent. ubi n. 43. « Ratio est (ait) quia vota secreta danda sunt, et ante publicatum scrutinium, et consequenter accessio publicato scrutinio facta nihil operari potest, non solum quia in formam, cap. *Quia propter* peccatum est, sed etiam quia se ipsum eligere videtur, qui dum ignorat, an alii ipsum electuri sunt, sibi ipsi votum dat, quod omnino prohibitum est, prout in terminis decisum reperitur in c. *Cum 5, de Elect.* quod tamen limitat Tondut. qu. *Benefic.* part. 1, c. 82, n. 7, nisi duo tantum supersint Canonici, quia quum forma cap. *Quia propter* non possit tunc servari, alter electioni per alterum de se factae accedere posset. Sed in electionibus, in quibus scrutinium formalitatesque illae non requiruntur, seu in quibus vota publice dantur, electus a medietate capituli electioni de se factae accedere non prohibetur. »

(40. Pariter in electione, in qua locum sibi vindicat forma c. *Quia propter*, post publicationem nequit major pars capituli accedere minori parti capituli, ut accedere indubie valet in electione, in qua non est necessaria forma cap. *Quia propter*. Louvrex dict. *dissertat. Canon.* 7, num. 49, et duob. sequent. Rot. car. Caprar. dict. dec. 537, a num. 3, ad

fin. ubi n. 7, et duob. sequent. « Non obstat (inquit) quod electio a principio nulla non possit convalidari etc. tum quia procedit haec regula in electione facienda ad formam cap. *Quia propter* secus vero in electione impropria, quia quum ista perficiatur ex simplici consensu naturali, satis est quod iste capitulariter superveniat sive ex verbis, sive ex factis etc. tum etiam quia posito quod electio reconvalidetur vigore novi consensus, ex nunc non confirmatur quod nullum est, sed potius inducitur novus consensus electionis: » et d. decis. 593, pariter a n. 3, ad finem.

(41. Praeterea in electione, in qua locum habet forma cap. *Quia propter*, nequit extraneus de consensu capituli admitti ad eligendum, potest tamen in alia electione: Louvrex *Dissert. Can.* 6, num. 23.

(42. Ad haec in electione, quae fieri debet juxta cap. *Quia propter*, locum esse nequit compromisso limitato, potest vero esse locus in alia electione; Louvrex *Dissert. Canon.* 6, num. 16. Rot. in recent. decis. 312, num. 53, et sequent. part. 4, tom. 2. Limitatum autem compromissum dicitur, si (ut ait Louvrex loco citat. num. 16.) « ita compromissum sit, ut compromissarii vota singulorum scrutentur, et exquirant, illumque eligant, in quem major, et sanior pars capituli censerit. »

(43. Usum denique sortis in electione faciendi ad formam cap. *Quia propter*, prohibitum esse, non est quod dubitari possit, quum non alia admittatur forma, quam illa quae fit, vel per scrutinium, vel per compromissum, vel per inspirationem. (44. Accedit quod Honorius III, in hac electione faciendi ad formam, c. *Quia propter*, expressum vetuit usum sortis, ut perspicuum est ex c. *Ecclesia, de Sortileg.* Quaestionis vero est, an idem obtineat in aliis electionibus. (45. Quoad electiones, quae fieri dicuntur a Patronis laicis ubi jure Collegii presentant, scissi inter se sunt Doctores. Negant usum sortis esse prohibitum Piton. *Controvers. Patronor.* allegat. 10, a num. 4, ad plur. sequent. ubi n. 22. quod praesertim procedere debeat negativa haec opinio, in casu in quo per suffragia duo fuerunt electi, sed neutrius electio conclusa remansit ob reiteratam paritatem votorum. Rota in recent. dec. 439, n. 23, part. 19, tom. 2. Prohibitum vero esse usum sortis affirmant Fagnan. in c. *Quia propter* n. 2, de *Elect.* Passerin. de *Elect.* cap. 18, n. 8. Rot. cor. Ansal. decis. 95, n. 10, cor. Herr. decis. 94, num. 4. (46. At novissime idem sacrum Tribunal Rotae in Pampilonen. Abbatiae de Turre 22. Martii 1748, cor. Illustrissimo Clemente impress. Romae 1781, apud Barbiellini quaestionem in genere definire nequit, ut patet ex sequentibus verbis § 9. *Ut autem de hac quaestione sit*; sed ex peculiaribus ejus circumstantiis improbavit electionem a Patronis laicis per sortes factam.

## ARTICULUS II.

*Electio quoad illos, qui possunt, vel non, eligere et eligi.*

(1. De Jure communi Jus eligendi Prae-

latum spectat ad Capitulum, seu Collegium, cujus Praelatus est eligendus; cap. *Nullus 1, cap. Cum terra 14, de Election.* cap. ult. caus. 16, quaest. 7, cum similibus. (2. Et hoc Jus diu in Ecclesia duravit, et etiam nunc in plerisque Ecclesiis, praesertim in Germania, ubi Collegium Canonicorum Cathedralium Episcopos, vel Archiepiscopos eligit, et electi a Romano Pontifice confirmantur. In aliis vero Regnis, ut in Gallia, Hispania, Lusitania, Polonia, etc., ipsi Reges ex privilegio Apostolico Episcopos nominant, et praesentant ab ipso Summo Pontifice instituendos: et in multis locis Italiae ipsemet Summus Pontifex nominat, et instituit, ex quo sibi reservaverit provisiones omnium Ecclesiarum Patriarchalium Archiepiscopalium, et Episcopalium in *Extravagant. Ad regimens, de Praebend.* et generaliter, et simpliciter soleat quilibet Summus Pontifex in initio sui Pontificatus talem reservationem facere quoad omnes Ecclesias vacantes, vel vacaturas, tam apud Sedem Apostolicam, quam extra Curiam, ut patet in 2 et 3, *Regula Cancellariae*, exceptis tamen supradictis Regnis, aliisque Privilegiatis per specialia concordata.

(3. Jus eligendi Praelatum, quamvis ex dictis de Jure communi competat ad Capitulum, seu Collegium, cujus Praelatus est eligendus, potest tamen, tum ex privilegio, tum ex consuetudine legitime praescripta, acquiri etiam ab aliis Clericis extraneis, cap. *Cum Dilectus 8, de Consuetudine*, et cap. *Cumana 50, de Election.* et Communis Doctorum. (4. Immo possunt ipsimet Capitulares, seu Collegiales Electores de communi omnium consensu communicare Clericis extraneis facultatem eligendi, sive secum coeligendi. Possunt enim Electores totam potestatem eligendi transferre in Compromissarios, etiam extraneos, ut cap. *Causam 8, cap. In causis 30, et cap. Quia propter 42, de Election.* ergo a fortiori poterunt de communi omnium consensu communicare potestatem aliquibus Clericis idoneis, ut secum eligant, ut factum fuisse pro electione Patriarchae Constantinopolitani habetur in cap. *Scriptum est 40, de Election.* (5. Si unus solus de Capitulo, seu Collegio remaneat, et aliis mortuis, privatis, suspensis, interdictis, vel excommunicatis, aut a Societate recedentibus, ille solus poterit eligere alium in Praelatum totius Collegii. Glossa in cap. *Gratum 2, de Postulat. Pralat.* Pirhing. lib. 1, tit. 6, num. 12. Donatus *Prax. Regular.* tom. 2, tract. 2, quaest. 10. cum aliis pluribus, quos allegat, et sequitur Passerin. de *Election.* cap. 10, quaest. 1, num. 8. Collegii enim, seu Universitatis Jus propter casus supervenientiam conservari potest etiam in una persona. Glossa in l. *Neratius*, ff. *de verborum significat.* et l. sicut ad fin. ff. *Quod cujusque univers. non.* et Glossa in cit. cap. *Gratum 2, de Postulat. Pralatorum*, verb. *Pauciores*. Pirhing loc. cit. et alii passim cum Barbosa lib. 1. *Juris Ecclesiast. univers.* cap. 19, num. 46. (6. Non posset tamen ille eligere seipsum, arg. cap. *In Scripturis*